



Desque'l ser humanu vive en sociedá, fueron desendolcándose distintes formes de facer frente a les necesidaes sociales que remanecen de la vida de mancomún y del procesu d'adaptación al mediu. Estes formes,

les necesidaes y hasta'l llinguaxe qu'utilizamos pa designar a les persones oxetu d'intervención social, fueron evolucionando a lo llargo del tiempu en función del momentu sociopolíticu.

L'ámbitu de la intervención social apaez coles modernes sociedaes del bienestar, col estáu de derechu y cola esmolición pol desenvolvimientu de la persona n'una sociedá xusta. La realidá ye

qu'atopámonos nun escenariu social onde les carencias sociales y económiques normalizáronse d'una manera desoladora. L'Alministración en primer instancia y la mayoría de la población en caberu llugar, almite ensin pudor que vivimos nun modelu que xenera desigualdaes y situaciones inxustes que lleven a bona parte de la población a sobrevivir. Neto que pel iviernu fai fríu y que l'agua mueya.

Asumiendo esta derrota pola xusticia y la igualdá, la propuesta pa xenerar sensación d'equilibriu o pa llanzar el máximu de muletes posibles ye la Constitución Española de 1978, que define la nuesa

sociedá como un Estáu Social y Democráticu de Derechu y empecipia un procesu tendente a construyir nel Estáu español un Estáu del Bienestar, que se define como'l conxuntu d'acciones llevaes a cabu per parte de los distintos gobiernos pa consiguir una mayor redistribución de los recursos y ameyorar el bienestar xeneral de la población. Produczse, poro, una intervención del estáu na economía y la sociedá pa combatir la desigualdá n'estos ámbitos y partir los beneficios de forma más equitativa ente la población. Pero non directamente, non al llargu plazu, non con oxetivos de tresformamientu.

Esta intervención faise,

na mayor parte de los casos, al traviés d'un treme de ONG, empreses, cooperatives, entidaes venceyaes a la economía social, etc. que se presenten a concursos públicos, roblen convenios y diversos alcuerdos que tienen como finalidá ganar la prestación de determinaos servicios que les alministraciones públiques nun garanticen de manera directa y antefieren esternalizarlos en cuenta de amenorgar dramáticamente los costos. Costos embrivíos que repercuten, na so gran mayoría, gastos en contrataciones de personal.

Y eses persones trabayadores, consideraes gastos poles entidaes

que constitúin eso que se conoz como Tercer Sector¹, abasnamos años de precariedá, protagonizaos por esos pliegos nos que se compite por ver quién contrata a la persona de manera más barata y en peores condiciones. Esa entidá que consiga a la persona trabayadora más precaria, llévase'l serviciu. La dignidá económica que te niega'l pliegu alministrativu, repóntela la empresa cargada de valores humanitarios y sociales que facen que la rueda de la esplotación siga xirando mientras miramos pa otru llau; mientras seguimos atendiendo a

toes eses persones que tán casi igual que nós pero nun y-paguen a final de mes por trabayar a favor de la xusticia social; mientres seguimos ampliando día ente día la nuesa xornada pa poder llegar a toles persones que nos precisen, nun vaiga ser qu'enriba nos echen por nun llegar a oxetivos. Sí. Oxetivos. Sí. Tercer Sector. Sí. Ameyorar la vida de la xente. Sí. Dignidá. Sí. Derechos. Sí. Igualdá. Sí. Contradicciones, munches contradicciones.

El capitalismu ye lo que tien, fai maxa y consigue que se xestionen ONG igual que se xestionen bancos. Los segundos cunten veceros y cuánto dinetu tien caún. Les primeres cunten probes y

¹ El Tercer Sector ye aquel sector de la economía compuestu fundamentalmente por entidaes ensin ánimu d'arriquecimientu qu'empresten servicios tales como teleasistencia, ayuda a casa, recursos residenciales, centros de día, mediación social, acompañamientos, etc).

cada añu hai qu'atender a más. Y si p'atender a más tenemos que ser menos trabayando, mejor. De xuru que la ratio puede espurrise un poco más y seguir amenorgando personal pa ganar el pliegue el próximu añu. Y si yá ven que van bien xustos, qu'igual pueden acusalos de facer una ufierta temeraria, pos yá si eso xustifiquen puestos d'acción voluntaria. Porque sí, n'esti llamáu tercer sector onde trabayamos pola construcción d'una sociedá más xusta, la voluntariedá sale inda más barata que los contratos de trabayu. Porque hai mucha perversión sobre'l conceutu de participación solidaria de la ciudadanía na sociedá. Y

les contradicciones son tamién bien visibles porque too val cuando se trata d'atender a probes, a persones en situación de vulnerabilidá o estigmatizaes. Eso que nunca fadries col circuitu ellétricu de la to casa: dexalo en manes d'una persona con muncha voluntá pero ensin la conocencia necesaria, faise acaldía nestes entidaes. Porque nun escaezamos qu'aforrar y sumar ye lo que cunta. A ver cómo se-y esplica a l'alministración pública de vez que nun lleguemos al número de probes que previen los pliegos.

Si en dalgún momentu la entidá de turnu plantégase que quier tener una llinia d'intervención

propia, non suxeta a financiamientu públicu, que vaiga 100% acorde colos sos principios y que, nel meyor de los casos, dexe ameyorar un pocu les condiciones llaborales, entós llancen a la cai a los rider de les ONG. Eses persones que carpeta en mano y col xilecu del color que correspuenda tienen como misión captar persones socies embaxo l'agua, el sol, el friú, el calor y siempre esixéndo-yos grandes sorries. Persones que cobren por oxetivos (si nun consiguen persones qu'apurran x cantidá de dinelu, nun cobren). Persones que nin siquier son contrataes, n'una grande mayoría de casos, poles entidaes pa les que capten

negociu, sinón que son contrataes por empreses esternes especialistes en captación que facen el so negociu con esto. Asina d'especializáu ta esti trabayu. Asina de precarizada ta la primer llínea de contactu con una sociedá que se precisa pa que la rueda xire, pa que les cuentes salgan. Y la suma davezu sal, sal porque los horarios son incompatibles cola vida, aquellos que son compatibles sonlo a cuenta de contratos con xornaes míseres que nun te dexen llegar a la fin de mes. Abegosu equilibriu. Tan abegosu como permediar aquello pa lo que te dicen que te contraten y aquello que finalmente termines faciendo.

Sumar sigue siendo lo que cunta y ¿qué se precisa pa facer informes sociales? Los códigos deontológicos de les persones qu'apostaron el so oficiu al ámbitu social nun paez qu'importen muncho. **Lo que sigue siendo importante ye que la propuesta que faigamos pa ganar el pliegu sía la más baxa posible.** Lo importante ye qu'el 31 d'avientu ayuntamientos, comunidaes, ministerios, nos digan que seguimos un añu más, que nos anueven el serviciu. Que la rueda de la precariedá que tien como misión ameyorar la vida de la xente siga, anque sía a cuenta d'empeorar los derechos de la clase trabayadora.

Porque esti ye a lo último el duble xuegu nel que les alministraciones

aforren con condiciones precaries y les empreses ONG compiten pola uiferta más baxa. Asina que tol mundu aforra, yá sía en calidá, en derechos o en dignidá. "Porque aforrar ye ganar". Una clase trabayadora que nel tercer sector ta conformada mayoritariamente por mujeres. Muyeres que soporten, na so mayoría, condiciones llaborales precaries: xornaes parciales, xornaes amenorgaes, mayores xeres d'intervención directa, dificultaes pa conciliar, contratos de duración determinada. El capitalismu vuelve facer malabarismos cola igualdá y equí, onde les muyeres tenemos más presencia numbérica, tamos infrarrepresentaes

nos puestos de responsabilidá.

Nós, mujeres y homes qu'emprestamos la nuesa fuerza de trabayu nel denomináu Tercer Sector, que nos dicen que contribuyimos cola nuesa fuerza de trabayu a combatir la desigualdá y partir los beneficios de forma más equitativa ente la población. ¿A quién facemos llegar la nuesa voz pa dignificar les nueses condiciones llaborales?

¿Al xefe? ¿Al ministru? ¿Al conseyeru? ¿O al alcalde?

Nós, obligaes a duldar nesta esquizofrenia

que ye trabayar con personnes vulnerables al empar que les empreses ONG trátennos como a torniellos sustituibles. Nós, fartes d'esa antinatural convivencia ente tratar a les personnes como números y los auténticos tresformamientos sociales. Nós qué camín queremos algamar. Alministraciones y empreses ONG, nós tamos nel camín de la dignidá, la defensa de los derechos de les personnes trabayadores y la denuncia de modelos d'intervención social basaos na competitividá, el baxu costu, la mano d'obra gratuita y la precariedá.

